

Dalša kročel je předparlament

Njebjelčicy (AW/SN). Inicijatiwna skupina za serbske ludowe zastupnistwo – Serbski sejm chce so na zakonskim zakładze spěšnišo swojemu zaměrej zblížić: wutworić Serbski sejm. Na sobotnej klawsturje w Njebjelčicach, na kotrejž so tež zapóslanc Sakskeho krajneho sejma Hajko Kozel (Lěwica) a předsyda Drježdžanskeho towarstwa „Stup dale“ dr. Andreas Kluge wobdźělištaj, wobzamkny so, hač do lěća 2017 založić předparlament. Žane dołhe powědanje hižo a čakanje na politiske rozsudy, běše mjenjenje přitomnych.

Předparlament ma być dalša kročel, docpěć kónčny zaměr inicijatiwy. Dale ma so za podpismowu akciju, podpěrowacu požadanje wo „zahajenje a wobjednanje zakonskich zakładow k wutworjenju demokratisce legitimowaneho zastupnistwa Serbow“, wabić. Z dotal 600 podpisarjow ličacej akciju chcedža wutworić radu starostow, wobstajacu z dwanaće wuznamnych Serbow. Wona měła zdobom kaž wólbna komisija fungować, wudawać wólbne podložki a kontrolować wólbny wotběh. Inicijatiwnicy su přeswědčeni, zo z předparlamentom wobsah, zaměr a nadawki přichodneho Serbskeho sejma dale a šěršo zjawnosći spřistupnja a dalšich Serbow wo jeho wažnosći přeswědča. Zajimowani móža kandidatow za předparlament namjetować. Wólby móhli so na zwołanej ludowej zhromadźiznje abo na wulkim swjedženju wotměć. Wuzwoleni měli so hižo z wěstymi nadawkami zaběrać, kotraž měł potom Serbski sejm wukonjeć. Předparlament nima pak rozsudžeć, ale spěchowacu a přisporjacu funkciju wukonjeć.